

# Dithero tsa Tirelano mo Kutlwanong

23/2015 Thero ka Sontaga o o bidiwang Kwasimodogeniti, e le ka 12. 04. 2015

## Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno, le kwadilwe mo 1 Petoro 1:3, le re: **"A go bakwe Modimo, Rra Jesu Keresete, Morena wa rona, o o re tsetseng gape ka fa boutlhwelongo pbolhoko jo bogolo jwa ona gore re nne le tsholofelo e e tshelang ka go tsoga ga Jesu Kereresete mo baswing,"**

1. Sefela sa 127 - 115/117

**2. Thapelo:** Morena yo o molemo, Moreswedi, a o galalediwe ka ntlha ya tsogo ya gago le ka go fenya loso. Re a go leboga, ka o re baakanyeditse tsela ya botshelo ka go fenya loso ka thata. O re felegetse gore re tshele ka thata e ya gago, re dumele gore le rona re tla nna le wena mo Parateiseng ka go tsosiwa ke wena mo losong lwa rona. Amen.

3. Lefoko la Testamente e kgologolo le kwadilwe mo go Jesaya 40:26-31;

Epistolo ka fa thulaganyong ya 2 e kwadilwe mo go 1 Petoro 1:3-9;

Efangele ka fa thulaganyong ya 3 e kwadilwe mo go Johane 21:1-14.

4. A go ipolelwe tumelo ya bokeresete!

5. Sefela sa 126 - 114/116

6. Thapelo ya mmadi wa thero.

**7. Efangele** ka fa thulaganyong ya 1 e kwadilwe mo go Johane 20:19-29, e re: "E rile ka maabanyana a lone letsatsi leo, e le la ntlha la beke, mejako ya kwa barutwa ba neng ba phuthegetse teng e tswetswe ka ntlha ya go boifa Bajuta, Jesu a tla a ema mo gare ga bone, a ba raya a re: 'A kagiso e nne le lona!' Ya re a sena go bua jalo, a ba bontsha diatla le letlhakore. Ya baa gona barutwa ba itumelang, ka ba bona Morena. Jesu a ba raya gape a re: 'A kagiso e nne le lona! ke a lo roma, jaaka Rara a nthomile.' Ya re a sena go bua jalo, a ba budulela, a ba raya a re: 'Amogelang Mowa o o Boitshepo! Ba lo ba itshwarelang dibe tsa bone ba di itshwaretswe; mme ba lo ba balelang dibe tsa bone ba di baletswe.' Thomase mongwe wa ba ba 12, yo o bidiwang

lefathha, o ne a se na nabo, fa Jesu a tla. Jaanong barutwa ba bangwe ba mo raya ba re: 'Re bonye Morena.' Ene a ba raya a re: 'Fa ke sa bone dipadi tsa dimapo tsa tshipi mo diatleng tsa gagwe, le go tsenya monwana wa me mo dipading tsa dimapo, ka ba ka tsenya seatla sa me mo letlhakoreng la gagwe, ga nka ke ka dumela.' Ya re morago ga malatsi a a robedi barutwa ba gagwe ba bo ba le mo teng gape, le ene Thomase a na nabo. Jesu a tla gape, mejako e tswetswe, a ema mo gare a re: 'A kagiso e nne le lona!' A ba a raya Thomase a re: 'Ntshetsa monwana wa gago kwano, o lebe diatla tsa me; o ntshetse seatla sa gago kwano, o se tsenye mo letlhakoreng la me; o se nne yo o sa dumeleng, mme o nne yo o dumelang.' Thomase a mo araba a re: 'Morena wa me le Modimo wa me!' Jesu a mo raya a re: 'Thomase, o dumetse, ka o mponye. Go sego ba ba dumetseng, le fa ba sa bona.'" Amen.

**8. Thero:** Phuthego e e rategang ya Morena Jesu, re sa ntse re gopola barutwa ba ba neng ba itswalela mo ntlong mo bosigong jwa tsogo ya Morena; gape fa ba ne ba se yo mo sefapaanong se Morena a bapoletsweng mo go sona. Ba utlwa gore Jesu o sule. Mmele wa ga Imanuele, Morena Jesu o o neng o se na mowa, o ne o phuthwa ka masela, wa bewa mo phupung.

Go itsiwe gore barutwa ba ne ba tshwenyegile mo dipelong ka ntlha ya moo. Gape re ba utlwela botlhoko. Morena o ne a sekisiwa, go ketekelwa, go nyadiwa, go kgwelwa mathe, go bogisiwa mo go maswe, le go bapolelwa mo sefapaanong. Khutsafalo e e maswe e ne e le mo go bone. Ba ne ba sa ka ke ba lebala botlhoko joo, le gore ya re Morena a ba a tlhoka thata mo tlalelong ya gagwe, ba mo tlogela, ba tshaba, le go iphitlha mo lefifing la lefatshe. Ba ne ba ipona molato, o ka re letsatsi le ne le sa tlhole la ba phatsimela, go le sefefe se se maswe se se ba futswetseng poifo mo dipelong gore ba boife katlholo e e botlhoko ya Modimo mo godimo ga bone. Ba gopola gore ka e le ba ba tla latelang Morena le bone tla bolawa ka botlhoko, ba swe jaaka Keresete, Morena wa bona. Ba boifa mo go maswe.

Fa ba ne ba sa ntse ba tshogile, ba inyatsa jalo, ga goroga pegelo ka phupo e e se nang sepe, fa baengele ba bolela gore o tsogile mo baswing. Ga akanngwa gore modisa wa tshimo o tsere setopo sa Morena. Go rewa go na le magodu a a utswileng setopo sa Morena. Mongwe wa barutwa ba ga Jesu a botsa Jesu, a re: "A ke wena moeng o le wesi mo Jerusalema yo o sa itseng tse di dirafetseng teng mo malatsing ano?" Ke ditiragalo tse di tshwanetseng go tiisa badumedi, gone di ruta gore "Morena o fa gare ga batho ba gagwe." Morena o teng, O tlele mo lefatsheng. A iponatsa mo matlong, le fa a tswaletswe kwa ntle. Go ntse jalo. Mo bathong ba ba mo tswalelang kwa ntle ga matshelo le dipelo tsa bone o e tla, o konyakonya mo mojakong wa teng. O ka re: Go iponatsa ga gagwe go ba tshosa, mme se segolo le se se re gogelang mo go

ene ke thata ya gagwe, fa ditswalo tse di lotletsweng di sa mo thibele gore a tsene. Dipelo tse di thatafetseng jaaka ya ga Faro wa kwa Egepeto ga di mo fete thata ya gagwe, o a di bula gore a tsene. Ke se se gakgamatsang tse a kgonang go di dira ka Mowa wa gagwe, le ka selotlele sa puso ya gagwe ya legodimo.

Go tshosiwa ke tiro e ya Morena go diragala mo mothong yo pelo le mowa wa gagwe o imetsweng ke segakolodi. Barutwa ba ne ba lebeletseng, fa Jesu a ne a iponatsa? Gopola gore ba ne ba mo tlogela, ba sala thata ya lefifi la ga Satane morago, ba thulamela, fa a ba kopa go disa le ene kwa Getsemane, ba ganetsanya gore yo mogolo mo gare ga bone ke mang, gape ba ne ba sa mmuelela bosigong jo a tshwarisitsweng ka jona. Peto a tthagelwa ke segakolodi, pelo ya mmetsa ka poifo, fa mokoko o ne o lela, le fa Peto o ne o sa gopole tthagiso ya ga Jesu, fa mokoko o ne o lela gabedi, mme fa Jesu a retologela mo go ene, a mo leba, o ne a gopola. Ba ne ba tshoga, ba le mmogo, ba itswaletse mejako. Jesu o ka reng mo go bone? A re: A kagiso e nne le lona. A kagiso e nne le lona? Phuthego ya Morena, gantsi re ikgaoganya le Modimo, re tlogela thato ya ona, ga re dise le ona, re batla go itirela tsa rona, re belaela ka thata ya gagwe ya go re thusa, re re: Ga o tthaloganye sepe. Ga re dumele Lefoko la ona. Gantsi jang?! Go ka nna tsholofelo e e ntseng jang mo bathong ba ba o nyatsang mo go kalo, le go tthapatsa Lefoko la ona, go o tsogela ka manganga, le go o eleletsa bosula mo ditorong le mo megopolong ya bone? Kwa pelo e boifang teng ka ntlha ya boleo, kwa matlho a leba kwa tlase ka ditlhong, ka gongwe tsholofelo e teng gore le rona re utlwe Lefoko le le sa re latlheng. Mokaulengwe yo o rategang, Jesu a re: A kagiso e nne le wena.

Tsogo ya baswi ke se se ne sa tshwenya ba bogologolo thata. Ba bantsi ba re: Morena ga a ka a tsoga, ba re: mmele wa gagwe o o suleng ga o a bowa go kopana le mowa wa botshelo, mme ba re tsogo ya gagwe ga tlhaga ka dikakanyo tsa barutwa fela. Le barutwa bangwe, ke raya fa gare ga rona mo dikerekeng tsa Lutere ga ba na bopelokgale go rera, fa Morena a tsogile. Ga ba tiise thero, fa baswi le bone ba tla tsoswa ka letsatsi le bofelo jaaka Morena a tsosiwa ka letsatsi la boraro. Paulo o hutsafala ka botlhoko jo bogolo, fa tsholofelo ya rona ya tsogo ya baswi e rerwa, jaaka ekeke ke tsietso, a re: Fa re solofela mo go Keresete tsa botshelo jono fela, re tla bo re tthomola pelo bogolo go batho botlhe.

Ka moo go molemo, fa Morena wa rona a nna le rona gore e nne kgomotso e kgolo mo go rona. Jesu yo o tsogileng ke ene Morwa Maria, Morategi wa Modimo. E ne e se sepoko, gongwe sedimo. O bonaditse barutwa diatla le letlhakore la gagwe mmogo le dipadi tsa dipekere le ntho ya

lerumo la lesole la Maroma. Keresete yo o tsogileng ke Keresete yo o neng a bapolelwa mo sefapaanong. Keresete yo o neng a bapolwa, le go tsoga, le go tshela, o teng o tshela mo bathong ba gagwe. Ke molaetsa yo o molemo mo go kalo.

Morena o re tlisetsang? Ka fa Lefokong la thero ya kajeno barutwa ba ne ba itumela, fa ba ne ba bona Morena. Rona? Fa a tla mo go rona re dirang?

Jaaka Jesu a romilwe ke Rraagwe, le go tla mo lefatsheng, le rona re rongwa gore re ye kwa re romelwang teng, le go dira se re se rometsweng. Ene o ne a romelwa gore e nne Modiredi le Mosupi wa boammaaruri. Le rona re romilwe fela jalo. Re bakeresete, ga re a tshwanela go ikgodisa, le e seng go itsietsa. Ga re bewe mo godimo ga ba bangwe go ba latlha, mme re tshwanetse go nna tekano, re itlhokomele, le go ipofa ka Lefoko la Morena, re nne le bopelonomi, re nne badiredi ba ba bangwe, re nne le pelo e e tlabologang, le e e inyatsang ka ntlha ya bosula. Re itshwaretswe ke Morena, jaanong re rongwa ke Morena gore re itshwarele ba bangwe, fa ba inyatsa, re itshwarelane letsatsi le ise le phirime. Gape ka taolo ya Morena re tshwanetse go kaela ba bangwe, fa ba sa ikemisetse go tlabologa.

Baruti ba bidiwa ke Phuthego go e direla ka tirelo ya dilotlele tsa puso ya ga Keresete. Ke se segolo thata, fa re utlwa moruti yo o itshwarelang baleofi mo leineng la Modimo o o Borarobongwe.

Thomase e ne e le motho yo o ntseng jang? Thomase o re ruta ka tsa rona, tsa me le tsa gago. Ga re a bona Morena ka matlho a nama. Le fa go ntse jalo, re dumela mo go ene. Ke bopelotlhomogi jo bogolo jwa Modimo Mowa o o Botishepo gore o dire mo go rona ka Lefoko la ona la Efangele; o a re direla gore re dumele, le go ipolela gore Jesu ke Morena le Modimo wa rona, re itshwarelwa ka ntlha ya gagwe.

Morena Jesu o ne a tla mo lefatsheng ka go re senolela tsa gagwe le go tshegofatsa phuthego ya barutwa ba gagwe ka letsatsi lele, ya re a sena go tsoga. Le rona o re tshegofatsa fela jalo mo phuthegong ya gagwe. Morena o nna mo bathong ba gagwe, o ba abela selalelo se se boitshepo sa gagwe. Mo barutweng ba gagwe le mo go rona a re: Se ke mmele wa me. Se ke madi a me. Tseo ga se magatwe gongwe ditshebo fela tse di itumedisang ditsebe tsa batho fela. Di teng ka boammaaruri jwa Morena, o teng ka mmele le ka madi a gagwe. O dira ka thata e kgolo ka tsona. Ga go diragale ka go dira ga rona. Re dumela, gongwe re sa dumele, Jesu o itlhagisa fela mo go rona gore tsholofetso ya gagwe e se nne lefela mo go rona. Ke mafoko a kgothatso mo go rona. A

Modimo o re tiise mo go ona le mo kopanong ya ona, o re bofe rotlhe ka kgole ya kagiso ya ona. A kagiso ya ona e e fetang tlhaloganyo ya rona e nne le rona ka metlha. Amen.

**9. Thapelo:** Morena Jesu Keresete, o re tsositse mo losong lwa go sa dumele. Re kopa mo go wena gore o re tiise mo tsholofelong ya gore Satane le lefatshe le nama ya rona di fentswe ke wena. Ga di ka ke di re thibela mo tseleng ya go ya mo botshelong jo bo sa khutleng. O re fe tumelo eo, o nne mo go rona ka kagiso ya gago. Amen.

Thapelo ya Morena: Rara wa rona yo o mo legodimong ...

10. Sefela sa 134 - 122/125

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke M. N. Mntambo, ka ngwaga wa 2009.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.